

Structuras dal di per tuts

Cussegl grond refusa in 'incumbensa da Beath Nay

■ **(anr/rgd) L'ultim di da la sessiun da zercladur ha il parlament grischun tractà differentas incumbensas e dumondas da deputadas e deputads. Structuras dal di restan vivanant accessiblas a tuts.** L'incumbensa da *Beath Nay* (indep., Cuira) n'ha betg chattà avunda suatientscha per obtegnair ina maioritad en il cussegl grond. Nay, ch'era commember da la Partida populara, vuleva restrencher l'access a las structuras dal di. L'incumbensa è vegnida renviada cun 83:6 vuschs tar quatter abstenziuns.

Stgaffir premissas per restrencher l'access

Mintga scola grischuna è dapi l'on 2012 obligada da porscher structuras dal di, sch'almain otg annunzias èn avant maun. Quai munta che las bleras scolas ston porscher als uffants la pussaivladad da restar durant l'entir di en scola. Uschia ha reagì il chantun a midadas en la societad. La cumpart da geniturs che lavuran parzialmain u cumplainmain vegn adina pli auta, che la mamma stat a chasa e procura per il tegnairchasa n'è betg pli la regla. Questas famiglias èn dependentas da l'access a structuras dal di. Deputà Beath Nay ha inoltrà in 'incumbensa concernent las premissas, sche scolas mettan a disposiziun structuras dal di. El ha proponì al cussegl grond ina midada da la lescha da scola. Nay tema che las structuras dal di pudessan vegnir malduvradas da tscherts geniturs. «Perquai che l'activitad professiunala n'è betg ina premissa per metter a disposiziun ina piazza da tgira sa mida

forsa l'idea raschunaivla da 'famiglia e professiun' en 'famiglia e dapli temp liber senza uffants', ha ditg Nay

Structuras dal di be cun mussament d'activitad professiunala

Las personas che han sutsegnà l'incumbensa èn commembers da las partidas pps, pbd, pld e pcd. Els vulevan incumbensar la regenza da midar la lescha da scola uschia ch'ina activitad professiunala fiss daventada ina premissa centrala per in'istituziun ch'è responsabla per la scola da metter a disposiziun structuras dal di e ch'il pensum da tgira avess gi da corresponder al pensum da lavur. En detagl vuleva la lescha permetter a personas ch'educheschan sulettas per exempel cun in pensum da lavur da 40 pertschient il dretg da dus dis da tgira. En cas da famiglias cun duas pajas fiss tà decisiv il pensum da lavur cumulà minus 100 pertschient. «Jau sai che la maioritad na vegn betg a sustegnair mi'incumbensa», ha ditg Nay en il plenum, «ma jau supplitgesch tuttina da far patratgs nua ch'in servetsch senza cundiziuns po manar.»

Regulaziun inadattada

L'onn da scola 2013/14 han 44 scolas grischunas purschì a lur scolaras e scolaras structuras dal di cun ina maisa da mezdi survegliada, l'onn da scola 2014/15 eran quai gia 54 scolas. La maioritad da las uras prestadas cumpiglian il temp sur mezdi. Las scolaras ed ils scolaras da la gronda part da las instituziuns responsablas per la scola na fan betg diever facultativmain da la

purschida da la tgira da mezdi, mabain per exempel per motivs geografics. Bleras vischnancas na pon betg pli manar in'atgna scola e differentas vischnancas cumpiglian fracziuns ch'èn per part situadas en moda fitg sparpagliada. Ils uffants pertutgads van pervia da quai a scola, normalmain cun meds publics, en in lieu central en la val u en la regiun e na pon perquai betg turnar a chasa sur mezdi. Blers geniturs na lavuran betg en lur lieu da domicil e na pon betg esser a chasa sur mezdi. «Gist personas che lavuran a temp parzial e che lavuran mintga di èn er mintga di dependents da purschidas d'assistenza, na pudessan dentant betg pli far diever da quellas sin basa da la regulaziun proponida en l'incumbensa Nay», ha ditg cusseglier guvernativ *Martin Jäger*.

La regenza è ultra da quai da l'avis ch'i dettia anc auter aspects positivs d'ina purschida da tgira per uffants. «A scolaras e scolaras da lingua estra gidan las purschidas da las ulteriuras structuras dal di d'emprender la lingua e da s'integrar en nossa societad.» Latiers vegnan ils custs per la tgira d'uffants sorprendids per gronda part dals geniturs. Betg d'emblidar è tenor Jäger la lavur administrativa supplementara che la realisaziun da la regulaziun proponida chaschunass. En differentas professiuns po il pensum sa midar pliras giadas er entaifer in onn. Per quests motivs ha la regenza proponì al cussegl da refusar l'incumbensa Nay. Il parlament è suandà la regenza ed ha refusà l'incumbensa Nay cun 83:6 vuschs tar quatter abstenziuns.